

四明叢書

張宗祥



明明子論語集解義疏卷七

清定海胡寅伯寅撰

述而第七

釋文凡三十九章注疏本作三十八章皇疏朱注皆三十七章翟氏考異曰舊多二

章應屬子於是日哭及子曰善人以下皆別分爲章陸氏所見舊本分於亡而爲有誤也

子曰述而不作信而好古竊比於我老彭

注包曰老彭殷賢大夫也

好述古事我若老彭祖述之耳

釋文好呼報反考文補遺老上有於字

正義曰朱注孔子刪詩書定禮樂贊周易修春秋皆

傳先王之舊而未嘗有所作也故其自言如此然當

是時作者略備夫子蓋集羣聖之大成而折衷之其事雖述而功則倍於作矣蒙案述說文循也循行故道曰述凡循其舊而申明之亦曰述故皇疏云述傳舊章也墨子非儒篇儒者曰君子循而不作凡創始曰作禮樂記知禮樂之情者能作識禮樂之文者能述作者之謂聖述者之謂明中庸云雖有其位苟無其德不敢作禮樂焉雖有其德苟無其位亦不敢作禮樂焉故皇疏云作謂新制禮樂也比周禮大司馬注親也樂記注同也釋名事類相似謂之比諡法解

擇善而從謂之比竊廣雅釋詁盜也私也取也孟子
其義則某竊取之趙注孔子人臣不受君命私作之
故言竊案竊與淺且爲雙聲似爲聊且姑且之詞傳
述舊文義無關於私取也竊比於我老彭猶言我竊
比於老彭竊比我於老彭古人多倒裝句法故考文
補遺老上有於字中說魏相篇竊比我於仲舒是其
例也我乃夫子自指不必謂夫子殷後老彭商大夫
而以我爲親之之辭也老彭殷賢大夫以壽考而稱
老猶曾子問夫子之稱老聃也大戴禮虞戴德篇孔

子對哀公曰若商老彭及仲傀政之教大夫官之教士技之教庶人揚則抑抑則揚綴以德行不任以言任庶人以言猶夏后氏之祔懷袍褐也行不越境此本孔子三朝記仲傀卽仲虺是老彭與仲虺同時故漢書人表列老彭於殷湯之世而不言卽彭祖自呂覽情欲篇云雖有彭祖猶不能爲也執一篇云彭祖以壽高注彭祖殷之賢臣治性清靜不欲於物蓋壽七百歲二注皆引論語以證故皇邢二疏云老彭卽彭祖而釋文引鄭君邢疏引王弼皆云老耼彭

是彭祖則又以老彭爲二人然彭祖爲殷人老聃爲
周人似應彭先而老後故班固幽通賦云若允彭而
偕老兮訴來哲以通情後漢書郭泰傳云巖岫頤神
娛心彭老而夫子何以顛倒其詞耶邢疏謂老彭卽
莊子所謂彭祖又引逍遙遊音義李云名鏗堯臣封
於彭城歷虞夏至商年七百歲故以久壽見聞世本
云姓錢名鏗在商爲守藏史在周爲柱下史年八百
歲錢音翦一云卽老子也崔云堯臣仕殷世其人甫
壽七百年蓋據史記老莊列傳云老子者楚苦縣厲

鄉曲仁里人也姓季氏名耳字伯陽諡曰聃周守藏
室之史也而張湯傳又云老子爲周柱下史禮曾子
問古者師行節疏引鄭君論語注云老聃周之太史
未知所出抱朴子明本卷云老子旣兼綜禮教又能
久視故仲尼有竊比之歎或以彭祖老聃同爲守藏
柱下史遂合商周二史爲一人一而二二而一出沒
變化老子豈眞猶龍耶大戴禮五帝德篇宰子問帝
堯子曰舉舜彭祖而任之楚辭天問云彭鏗斟雉帝
何饗王逸注彭鏗彭祖也好和滋味善斟雉羹能事

帝堯堯美而饗食之以壽考彭祖至八百歲猶自悔
不壽恨枕高而唾遠也是又以彭祖爲堯時人潛夫
論讀學篇云顓頊師老彭孔子師老聃則又以老彭
爲顓頊時人愈推愈遠愈出愈奇事涉洪荒言不雅
馴摺紳先生難言矣神仙傳云彭祖者顓頊之元孫
也殷末已七百六十七歲而不衰老少好恬靜不卹
世務不營名譽不飾車服惟以養生治身爲事曰吾
遺腹而生三歲而失母遇犬戎之亂流離西域百有
餘年加以少枯喪四十九妻失五十四子數遭憂患

和氣折傷恐不度世乃去不知所之其後七十餘年
聞人於流沙之國西見之列仙傳云彭祖帝顓頊之
孫陸終氏之中子歷夏至殷末八百餘歲常食桂芝
善導引行氣歷陽有彭祖仙室易林云彭祖九于據
德不殆南山松柏長受嘉福是皆莊叟怪誕之寓言
呂覽神仙之幻說子常絕之而不語豈宜引之以證
經考之大戴禮帝繫姓曰顓頊娶於滕隍氏滕隍氏
奔之子謂之女祿氏產老童老童娶於竭水氏竭水
氏之子謂之高縞氏產重黎及吳回吳回氏產陸終

陸終氏娶於鬼方氏鬼方氏之妹謂之女隤氏產六子孕而不粥三年啓其左脇六人出焉其一曰樊是爲昆吾其二曰惠連是爲參胡其三曰錢是爲彭祖其四曰萊言是爲云鄩人其五曰安是爲曹姓其六曰季連是爲芊姓昆吾者衛氏也參胡者韓氏也彭祖者彭氏也云鄩人者鄭氏也曹姓者邾氏也季連者楚氏也孔巽軒補注曰彭祖彭姓之祖也彭姓諸國大彭豕韋諸稽別爲舟人禿姓大彭歷事虞夏於商爲伯武丁之世滅之故曰彭祖八百歲謂彭國八

百年而亡非實錢不死也春秋時彭爲宋邑鄭語大
彭豕韋爲商伯矣當周未有又曰彭姓彭祖豕韋諸
稽則商滅之矣禿姓舟人則周滅之矣韋昭注大彭
陸終第三子曰錢爲彭姓封於大彭謂之彭祖彭城
是也豕韋彭姓之別封於豕韋者殷衰二國相繼爲
商伯其後世失道殷復興而滅之禿姓彭祖之別舟
人國名也史記楚世家彭祖氏殷之時嘗爲侯伯殷
之末世滅彭祖氏集解虞翻曰名翦爲彭姓封於大
彭世本曰三曰錢鏗是爲彭祖彭祖者彭城是也正

義引括地志云彭城者彭祖國也嚴鐵橋謂彭祖國
名卽大彭夏商爲方伯唐虞封國傳數十世八百歲
而滅於商然則彭祖者謂彭姓之始祖肇封於唐虞
至商中葉大彭爲霸諸侯而滅於武丁之世故漢書
人表復列大彭豕韋於祖丁陽甲之時而湯時之老
彭卽大戴論語所稱而初非所謂彭祖也老彭之好
古別無所見惟呂氏春秋有少好恬靜惟以養神治
生爲事及爲大夫稱疾不與政事好觀覽古籍以政
教大夫云云似卽本大戴論語而合記之然則夫子

一則曰老彭再則曰老彭猶曾子問之每稱老聃則
其人之壽考可知夫日月得天而能久照四時變化
而能久成聖人以久道化成天下久則閱歷多而處
事彌定久則聞見博而析理愈精學則古昔稱先王
誠有非年老不能勝任者我夫子祖述堯舜憲章文
武紹百王之統緒集千聖之大成蓋羣聖所作因時
制宜不過創一代之新法夫子所述折衷考訂將以
垂萬世之常經朱子所謂事雖述而功倍於作者似
非高年老壽不爲功故觀此篇所類敍不知老之將

至忽歎甚矣其衰夫乃知夫子之竊比老彭假年學
易實有祈天永命益壽延年之意焉王者行仁以必
世善人爲邦以百年中庸曰有大德者必得其壽吾
得而轉之曰有大壽者乃成其德

包注云云疏曰祖述之耳義本中庸邢本作但述耳
筆解作而已但述而已言外有不作意較皇本爲長
子曰默而識之學而不厭誨人不倦何有於我哉注鄭曰人
無有是行於我
我獨有之也

釋文默俗作嘿亡北反厭於豔反倦其卷反朱注識
音志又如字

正義曰朱注識記也默識謂不言而存諸心也一說
識知也不言而心解也前說近是蒙案識說文常也
謂旗常之標識也字又作幟作誌行軍之旗識所以
審別而不亂銘器之款識所以記憶而不忘詩瞻卬
箋識知也周禮保章氏注識記也皆一義之引申也
鄭君以志爲識之古文又見禮運哀公問注詩序在
心爲志韓詩外傳存其精神以補其中謂之志荀子
解蔽篇志也者臧也識固以默而深湛爲貴易繫辭
傳默而成之存乎德行猶顏子之不違如愚得一善

則拳拳服膺而勿失之也識與學誨三者並列識爲
識其所已得學爲學其所未得誨則欲人之同得抑
爲之不厭誨人不倦見本篇我學不厭而教不倦見
孟子此皆夫子所自任默識卽承上述而不作信而
好古之意亦非甚難下文多言學而不厭誨人不倦
之事皆可以互證何有者不難也如子言於從政乎
何有能以禮讓爲國乎何有孟子於答是也何有皆
以何有爲不難之詞何有於我猶言於我何難之有
倒裝句法自任實自勉也鄭注似太誇朱注又太謙

矣

鄭注云云疏曰鄭意以誰訓何謂誰有是行如我哉故云人無有是行於我我獨有之也皇疏以是行絕句言天下人皆無此三行也我獨有之故天下貴有於我也又引李充曰言人若有此三行者復何有貴於我乎斯勸學敦誨誘之辭也殊非鄭意

子曰德之不脩學之不講聞義不能徙不善不能改是

吾憂也

注孔曰夫子常以此四者爲憂也

釋文徒思爾反皇本高麗本每句下有也字考文補遺一本徙作從